

4.

3

EXCURSIO IN ANTIQVITATES  
AD

SERVI MEDICI  
APVD GRÆCOS ET RO-  
MANOS CONDITIONEM.  
ERVENDAM

Oder :

Was es mit der Knechtschaft derer Aerzte bey  
denen Griechen und Römern vor eine Bewandniß  
gehabt hat.

QVAM

P R Æ S I D E

D. IOANNE HENRICO SCHVLZE  
MEDICINÆ ELOQVENTIÆ ANTIQVITATVM ET  
PHILOSOPHIÆ PROFESSORE PVBLICO  
ORDINARIO

ACADEMIÆ CÆSAREÆ NATVRÆ CVRIOSORVM ET  
REGIÆ SOCIETATIS SCIENTIARVM BERO-  
LINENSIS SODALE

PRO GRADV DOCTORIS  
PVBLICE DEFENDET


a. d. Aprilis MDCCXXXIII.

HIERONYMVS BERNEGAV  
HOLMIA SVECYS.

---

HALAE MAGDEBVRGICAE

Typis JO. CHRIST. HILLIGERI, Acad. Typogr.



Sum R.um M.um SVECIAE

ARCHIATRO PRIMARIO REGII COLLEGII PRÆSIDI

ATQVE MEDICINÆ DOCTORI

NOBILISSIMO ET EXPERIENTISSIMO VIRO

DOM. IO. HENRICO WOLLHVN

GENEROSO ET NOBILISSIMO  
VIRO

NOBILISSIMO EXPERIENTIS-  
SIMOQVE VIRO

DOM. IO. CHRIST.  
NORDENHEIM

DOM. EVVALDO  
RIBE

M. D. Archiatro Regio & Regii Collegii  
Medici Assessori.

M. D. Archiatro Regio atque Practico  
Holmiensi.

NOBILISSIMO ATQVE EXPE-  
RIENTISSIMO VIRO

NOBILISSIMO EXPERIENTIS-  
SIMOQVE VIRO

DOM. NICOLAO  
BOYE

DOM. CONSTAN-  
TI SOEM

M. D. Regii Colleg. Medic. Assessori vi  
& Poliatio Holmiensi.

M. D. Regii Colleg. Med. Assessori &  
Medico Aulico.

NOBILISS. EXPERIENTISSI-  
MOQVE VIRO

NOBILISSIMO EXPERIENTIS-  
SIMOQVE VIRO

DOM. CAROLO  
ALSTIN

DOM. ERICO VI-  
CTORINO

M. D. Regii Colleg. Medici Assessori  
& Medico Aulico.

M. D. Regii Collegii Medici membro &  
Practico Stockholmjensi.

VIRIS

VIRIS .

PER OMNIA OPTIME MERITIS

ARTIS ASCLEPIADEÆ COLUMNIS

FIRMISSIMIS

DOMINIS MÆCENATIBVS ET PROMOTORIBVS

OPTIMIS MAXIMIS

DISSERTATIONEM HANC INAUGVRALEM

QVO DECET OFFICIO

*D. D. D.*

TANTORVM NOMINVM OBSERVANTISSIMVS

CULTOR

HIERONYMVS BERNEGAV.

Q. B. F. Q. V.  
DISSERTATIO INAUGVRALIS  
MEDICA

DE  
SERVIS MEDICIS:

---

PRAEFATIO.



Vo praecipue sunt, quæ medicis solent obiici ab illis, qui ordini huic ægre facere præclarum putant: alterum quidem, quod Romæ omnes in exilium pulsî, vrbe illa per sexcentos annos caruerint; alterum vero, quod medicinam Romæ quondam serui tantum exercuerint. Priorem quidem calumniam, qua nihil forte vñquam impudentius propalatum, nihil imprudentius creditum & propagatum fuit, mascule iam repulit CAROLVS DRELINCVRTIVS, edita clc lhc LXXI. *apologia medica*: alteram vero exprobrationem subinde recoctam passim quidem videre & legere licet. Sed præter ceteros in ea re asserenda & comprobanda maiori industria, nec sine modestia, versatus est V. CL. CONYERS MIDDLE.

DLETON, academiae Cantabrigiensis proto-bibliothecarius, edita *de medicorum apud veteres Romanos degentium conditione*, dissertatione cl. lcccxxvi. cuius deinde *defensio contra anonymos quosdam notarum breuium, responsionis atque animaduersionis auctores*, cl. lcccxxvii. sequuta fuit, cui quidem inscribitur, quod sit *pars prima*: alteram vero, aut plures editas non inuenio; ad meum saltem conspectum non peruenerunt. Neque impetrare potui ipsa illa, quæ CL. MIDDLETONO in Anglia fuere opposita scripta. Quum apud Britannos contentio ista deferbuisset, apud Batauos in medium prodiit D. D. DANIEL VINK, editis *amoenitatibus philologico-medicis*, quibus *medicinam a seruitute liberat*, multoque labore inquirat, an *medicina antiquitus fuerit studium illiberale, seruisque tantum proprium*. Traiecti ad Rhenum cl. lcccxxx. Videri itaque poterat superfedere nos huius commentationis labore omnino potuisse, quum vix aliquid superesse queat, de quo non in alterutram partem copiose disputatum fuerit. Forte erunt etiam, quibus omnino videbitur consultius sepultam iacere controuersiam, quæ non sine acerbitate agitata quondam fuit: præsertim quum ipsi illi, quibus pro seruitute medicorum, apud

apud priscos Romanos differere placuit, vltro concedant & fateantur nihil decoribus amplissimis verorum, qui hodie apud cultiores Europæ gentes sunt, medicorum decedere, nihilque dedecoris affricari, si omnino nihil esset in tota re quod negari ab vlllo mortalium posset. Enimvero contentionem renouare pridem intermissam neuti- quam cupientes, existimauius non ingratum le- ctoribus fore, si, quæ ad summam rei pertinent, paucis edisseruerimus, seruumque medicum, qua- lis vere fuit, ex monumentis Græcorum & Ro- manorum produxerimus, quo iudicari possit an iure obiici medicinæ, eiusque cultoribus huius æui, possit illorum miseria, qui, temporum iniqui- tate obstante, neque illud, quod homini dulcissi- mum & pretiosissimum esse debet, habuerunt, neque istud a quo denominationem gesserunt, quodque in seruo etiam laudandum & æstiman- dum erat, plerique possederunt, artem scilicet in- tegram, quæ mortalibus tanta beneficia præstat, vt magno veterum consensu a diis immortalibus originem traxisse & ad homines delata esse fuerit credita. Et quamquam prorsus negari haud pos- sit eorum aliquos, certè inter Romanos, ad vni- uersam artem fuisse institutos; quod inferius clare probabimus: nec ex hoc tamen amplissime con-

concesso medicis quicquam probro dari hodie poterit: quum pauci sane ordines hominum superfuturi sint, quibus non obiici pariter possit, quod numerosos socios in priscis seruitiis quarundam gentium, & si id cupiunt, Romanorum inueniant. Id vero ex instituto nunc docere non est nobis propositum: neque tamen omnino dissimulandum fuit, quum mores veterum institutaque in vno negotio recte aestimare nemo possit, nisi qui simul considerauerit rem omnem, quam latissime illa patet. Et hoc quidem effecit, vt necessarium putarem, ante quam de seruo medico diceremus, de seruo in vniuersum dispicere, maxime vero rem ad Græcos & Romanos referre, quum seruos medicos apud Græcos primum inueniamus, ab his deinde ad Romanos, vt nos probaturos speramus, sero demum translato. Quod superest lectorem beneuolum rogamus velit se æquum nobis præbere, & quæ libere diximus & absque dissimulatione protulimus, bonæ causæ fiduciam interpretari. Scilicet abunde multum gloriæ superest medicis primorum artis antistitum indubiis honoribus comparatum, si quis aliquo, quod suum tamen non est, ornari desiderat, etiamsi innumeri concedantur fuisse, qui vel nulla vel aliqua sua culpa ad inferiorem fuere



locum depressi. Et si nemo antiquissimorum medicorum aliquo honore fuisset, totusque ordo non aliis & antiquioribus fulgeret ornamentis, quam iis, quæ Summorum Imperantium indulgentia ante complura iam sæcula in illum collata sunt: sufficiunt certe illa, utpote amplissima, ad dignitatem & nobilitatem indubiam: prorsus ut nihil opus sit antiqua monumenta suppressere aut mutilare, aut coacta interpretatione sensum, quem nunquam habuerunt, ex illis extorquere. Illud quoque profitemur, non animum nobis fuisse dicere omnia, quæ de servis, aut servis etiam medicis, dicenda fuissent, si iustum librum condere voluissemus: sed ea tantum edisserenda statuimus, quæ effecerunt, ut ipsis nobis non videatur medicis vlllo modo ignominiosum esse, quod alii, nescio quam ob causam, tam anxie negatumeunt: tamquam confessum esset nihil rectum, honestum aut turpe iudicandum esse, nisi quod priscis Romanis tale visum fuit, illis scilicet, quos proprius ipsorum vates HORATIVS, ubi auream Romæ ætatem describit, rusticorum militum elogio mactavit. Faxit DEVS, ut naturæ legitimo modo inseruientes medici, humanæ gentis plurimo fructu & emolumento, gloriam amplissimam & honores immortales porro reportent.

## §. I.

**Q**Vos Romanorum lingua *seruos* vocamus, aut *mancipia*, hi sunt illi, qui constitutione iuris gentium dominio alieno contra naturam subiiciuntur. Ex eo autem appellati sunt *serui*, quod victores superatarum bello gentium captiuos vendere, ac per hoc seruare, quam occidere maluerunt: *mancipia* iidem dicti sunt eo, quod ab hostibus manu capiuntur: teste IVSTINIANO *Instit. Lib. I. tit. III.* Græcis vocantur δούλοι, cuius etymologia non admodum clara est: reliqua vero nomina, vt ὑπηρέτης, δεσπόσιος, δεσπόσινος, non ita perpetuum ac fixum significatum habent, vt id, quod formale est in seruitute, necessario denotent.

## §. II.

In seruorum conditione nullam esse differentiam, imperator enunciat *l. c.* Id vero quo pacto intelligendum sit, apud interpretes videre iuuat. Fuisse certe inter illos, qui seruorum nomine veniebant, aliquos *statu liberos*, constat: vt & inter serui publici & priuati conditionem notabilis intercessit differentia: de quo conferantur *ILL. HEINECCII antiquitat. Rom. ad instit. Lib. I. tit. III.* Si vero aliarum gentium, præter Romanos, inspiciamus seruos, non pauca obseruare licet, quæ a Romanis moribus recedunt, & seruorum conditionem diuersam ostendunt. Vt enim non negari potest-

test ubique per gentes Græca lingua vsas offendi seruos proprie dictos : fuisse tamen in iisdem populis aliquos, quorum conditio fuerit μεταξύ δούλων καὶ ἐλευθέρων, *inter seruos & liberos ambigua*, multis exemplis, vno quasi intuitu, discimus apud IVL. POLLUCEM. *Lib. III. cap. VIII.* cui adde, si placet, STRABONEM *lib. XII. p. 542. & 701.* SVIDAM in *versibus πένεσας ἐλωτέυειν.* ARISTOTELEM *politic. II. cap. 7. & 8.* Qualis seruorum conditio apud priscos Germanos fuerit, clare edocet TACITVS *de morib. Germ. cap. XXV.* ex quo satis liquet, quam tolerabili fortuna vsi fuerint, si cum illis conferantur, qui Romanis seruiebant.

### §. III.

De origine seruilis conditionis multum hic disputare nihil ad rem pertinet: paucis indicasse sufficiat, quod, vt probabile PVFENDORFIO *de offic. hom. & civ. lib. II. cap. 4.* videtur, primum inopia adacti aliqui seipsos vel liberos suos aliis opulentioribus addixerint, vel alimentorum ceterorumque necessariorum exhibitionem, vel certum pretium, pacti: quod quidem inter multas gentes hodieque fieri a multis itinerum scriptoribus annotatum inuenimus: iure etiam ciuili Romanorum ita permissum erat, si liber homo, maior viginti annis, ad pretium participandum sese venum dari pateretur: aut patres filios, quos in potestate habebant, vendere vellent. Sed postea, quum bella passim increbescerent, multique captiui redderentur, victoribus seruire iidem cogebantur: vt & in pœnam irrogabatur seruitus, ac spurii multis locis ad feruilem statum detrudebantur. Quocun-

que autem modo seruilem sortem aliquis subiisset, eadem conditio in natos etiam propagabatur: ex quo apparet, quantopere seruile genus, quod FLORVS *hist. III. 20. secundum genus hominum* facete dixit, multiplicari debuerit, postquam semel inuentum, eiusque magnæ utilitates, quas liberis afferre possunt, cognitæ fuerunt.

§. III.

Non possum quin paucis tantum admoneam, quam facile fuerit honestissimo cuius viro seruitutis iugo submitti, a quo sese liberandi viæ non omnibus æque paruerunt. Certe legatos populi Romani, prætores cum suis fascibus, summorum ducum familias & liberos in seruitutem abreptos legimus; quibus quidem tam nobilibus non videntur facile defuisse, qui redimerent: sed & facile existimari potest, multis aliis honestis & ingenuis viris, quorum facultates per se minores, bello autem penitus attritæ erant, eandem semet in pristinam libertatem adserendi facultatem haud fuisse. Seorsim vero medici, in hanc calamitatem semel delati, vix inueniebant expediendi sese vltos modos: omninoque difficiliter inueniebant, quo magis felicia artis specimina ediderant. Cognosci illud potest exemplo Democedis Crotoniensis, cuius insignem gloriam, artis operibus partam, sed & grauissimam seruitutem & non nisi præclaro dolo tandem recuperatam libertatem, copiose iucundeque describit HERODOTVS *Libr. III. cap. 130. seqq.* Sed & illud facile cognoscitur vnicum talem virum ad auari domini imperium debuisse pluribus seruis ad eandem artem instruendis & exercendis operam dare, quo cariori pretio vernas quisque suos diuendere posset, quum

quum vix aliis maius, quam seruis medicis, statueretur pretium.

## §. V.

Si varias res publicas celebriores consideramus, haud eandem vbique seruorum copiam inuenimus. Non vacat multis inter se collatis hanc rem ostendere: quare paucarum exempla sufficiant. Inter Græcos celeberrimæ sunt Lacedæmonia & Atheniensis. Illa quidem tota comparata erat, vt vnicius ciuium labor esset militare: a quo si feriandum esset, nihil præclarius otio existimabant, nihil homine dignius; quod quidem vlllo testimonio hic adducendo comprobare supersedeo, quum nemo esse possit bonarum litterarum tam rudis, vt hoc non abunde norit. Quicquid igitur ad quotidianæ vitæ siue necessitatem siue commoditatem requiritur, id omne per seruos agebant: quippe omnino nullam artem aliam Lacedæmonius ciuis callebat, quam hostem cedere, feras persequi, & ius nigrum abligare. Vnde factum est, vt ista respublica subinde maxima damna & dedecora a seruis multis, paucis vero liberis, acceperit, notante ARISTOTELE *l.c.* Sed Atheniensium ciuitas, Mineruæ alumna, contrario ducebatur studio, vt liberorum ciuium valeret numero insigni, illa autem multitudo victum & reliqua necessaria honesto labore, opificiis & artificiiis potissimum, sibi quæreretur, & ex ipsa republica emolumenta perciperet.

## §. VI.

De Atheniensium republica testis nobis amplissimus est PLVTARCHVS in *Solone*, quanto studio ad artes colendas ciues deduxerit, maximeque cauerit ne

vrbs impleretur seruili multitudine. Quum vero illi, qui victum quærere mercenaria opera & opificiis coguntur, haud omnes amplum censum possideant, ordinem tamen honorauit ciuitatis iure : quumque quatuor in classes distributa respublica omnis esset, vltima completebatur τοὺς θῆτας, pauperiores, qui victum opificio, vel alia mercenaria opera, sibi quærebant. His quidem ad magistratum gerendum accedere non licebat, nec militare extra patriam; quoniam id sumtuosum erat, cogebantur : sed δικάζειν, ius dicere & ἐκκλησιάζειν in concione populi verba facere, permisit, vt duobus istis modis ad vitam sustentandam iuuarentur. Quod etsi initio, inquit PLVTARCHVS l. c. nullius momenti videbatur, tamen permagnum esse posterius apparuit, quod pleræque controuersiae ad iudices deferrebantur. Nam & quarum causarum iudicia magistratibus tribuit, (Solon) earum concedebatur iis, qui vellent, a magistratibus ad iudices prouocatio. Conferatur, si placet, SVIDAS in vocibus ἱππεῖς & θῆτες, & Scholiastes ARISTOPHANIS ed Equit. p. 326. ad Küster.

## §. VII.

Vtriusque reipublicæ in hac parte differentiam iucunde intelligimus ex illo omnis bonæ doctrinæ promocondo PLVTARCHO. Et Lacedæmoniorum quidem conditionem publice prodidit Agesilaus, dux Græci exercitus aduersus Thebanos adducti. Nam quum socii causarentur Lacedæmoniorum ad hoc bellum misforum paucitatem, Agesilaus, quo ostenderet Spartano- rum militum multitudinem, vniuersos socios inter se confidere iussit, Lacedæmonios seorsim. Inde præconis voce primum figulos iussit, postea ærarios fabros sur-  
gere,

gere, inde lignarios, tum ædificatores, reliquosque secundum omnia artificia. Ita vniuersi fere focii, nemo Lacedæmoniorum, surrexit. Nullam enim iis artem quæstuariam addiscere aut tractare legibus permittitur, (ἀπέριητο γὰρ αὐτοῖς τέχνην ἐργάζεσθαι, καὶ μανθάνειν βιάναυσον.) in *Agésil.* pag. 610. 611. In Pericle autem quando idem auctor exponit, cur magnus hic vir Athenas tot ornamentis, tam admirandis; exornauerit, atque tantas impensas eius causa fecerit, illam potissimum reddit rationem, quod voluerit omnes ciuium ordines locupletare, interque eos diuitias distribuere: quare maxime infimam ciuium classem, τὸν βιάναυσον ὄχλον, longis & pretiosis operibus conficiendis occupatum reddidit. Nimirum, inquit pag. 159. materia eorum operum requirebatur lapis, æs, ebur, aurum, ebenus, cupressus: deinde artifices, qui in ea elaborarent, materiam ac opus conficerent, fabri, figuli, ærarii, lapidicæ, infectores, auri-fabri, sculptores eboris, pictores, phrygiones, tornatores: item qui materiam adueherent, in mari mercatores, nautæ, gubernatores, in terra fabri carpentarii, ii, qui equos ad currus trahendos alunt, aurigæ, restiones, textores, sutores, viarum paratores, metallorum fossiores. Sub vnaqualibet artium, tamquam suo duce, erat exercitus suus hominum priuatorum, ac mercedis causa operas locantium, tamquam instrumentum & corpus, quo ars suum opus perficeret. Ex quo quidem loco satis, vt arbitror, elucet, ex quibus hominibus constituerit τὸ θητικὸν πλῆθος, infima seu quarta classis ciuium Atheniensium, quos omnes Lacedæmonii ad seruilem conditionem detruferant.

## §. VIII.

Venimus ad Romæ priscae considerationem, qualis illa fuerit in hac quidem parte, quæ ad seruos spectat. Huius autem urbis originem primam ex latronibus, seruis fugitiuis, desertoribus, & huius generis hominibus, qui ob mala facinora, aut æs alienum, ad asylum nouum perfugerant, fuisse conflatam, ne ipsi quidem Romani scriptores negant, vt nec dissimulant, quod nullum honestum virum permouere potuerint, vt filiam sibi in matrimonium traderet, quare virginum Sabinarum raptu opus erat, nisi genus omne suum vellent intercidere. In his quidem, quum post Romuli fata rex designaretur Numa Pompilius, isque hominibus, qui, **EVTROPIO** teste *Lib. 1. c. 2.* consuetudine præliorum iam latrones ac semibarbari putabantur, leges moresque constitueret; videtur quidem rex optimus Martiam suorum indolem, Lacedæmoniis similem, ad mansuetum Mineruæ Atticæ genium voluisse inflectere; sed idem, in hoc quidem, fatum expertus esse cum Lycurgo, quum is feminarum Lacænarum mores bonis legibus corrigere tentaret. Scilicet Romuli institutum fuerat, prodente **DION. HALICARNASSEO** *antiqu. Rom. L. II. p. 98.* ne quis suorum exerceret ἐπιδηφείους, καὶ βανόυσους τέχναις, *sellarias & manuarias artes*, sed tractandas eas δούλοις καὶ ξένοις ἐπέδωκε, *seruis & peregrinis tradidit*. Hoc erat prorsus Lacedæmonium. Sed Numa regno admotus, **PLVTARCHO** teste, *pag. 64.* Romam εὐθὺς ἐπεχείρει ὥσπερ σιδηρὸν ἐκ σκληρᾶς καὶ πολεμικῆς μαλακωτέραν ποιῆσαι καὶ δικαιοτέραν, *illico aggressus est tamquam ferrum ex rigida & bellicosa molliorem iustioremq; effice*



*cere.* Id vt impetraret, instituit collegia & corpora artificum & opificum, & eorum unicuique generi suos peculiare conuentus & religiones præscripsit, eodem iterum teste PLVTARCHO *pag. 71.* qui nominibus suis recenset aliqua tunc iam instituta collegia. Atque hunc totum locum doctissime illustratum ab Ill. HEINECCIO in dissertatione *de collegiis & corporibus opificum* cum fructu relegere iuuabit.

### §. VIII.

Constituit itaque Numa collegia, & ciues ad industriam & honestum laborem vocare aggressus est: sed quam parum durauerit illius instituti fructus, sequentium temporum historia addocet: quum, teste DION. HALICARNASS. *antiq. Rom. lib. II. pag. 98.* satis longo tempore Romanos puduerit talium operum, ita vt ex indigenis nemo animum eo adpulerit. Quin successor Numæ, Tullus Hostilius, contrariam in partem omnia vertit, & omnem rempublicam militarem reddidit. Non vacat rem clarissime descriptam ab Ill. HEINECCIO repetere: sufficiat dixisse, post irritos Seruii Tullii conatus, vltimum tandem Romanorum regem Tarquinium collegia omnino fustulisse, atque ab illo tempore iacuisse, donec plebs, oppressionum a patriciis pertaesa, tribunos sibi dari impetrauit, tandemque ius etiam honorum & sacerdotiorum senatui extorquere cœpit. Deinceps restituta collegia fuerunt, iisque, qui adscripti illis erant, suffragii etiam ius fuit permissum, vt, indignantibus quidem patriciis, omnium ab vniuerso populo Romano sancientorum ac constituendorum participes fuerint.

## §. X.

Neque tamen hæc res efficere valuit, ut non servorum incredibilis multitudo Romæ superesset, quum nobilissimus quisque ac opulentissimus Romanorum diuitiarum præcipuam partem illam existimaret, habere rei domesticæ animata instrumenta quam plurima. Rem hanc docet nos PLVTARCHVS in *M. Crasso* p. 543. 544. cuius quum diuitias incredibiles exposuisset, hæc addit: *Quum autem permultum argenti, prædiague pretiosissima, possideret, inque iis operarios quamplurimos haberet; hæc tamen omnia parui ducenda existimari debebant, cum mancipiorum eius pretio collata: tot ille talesque servos habebat anagnostas, scriptores, argentarios, dispensatores, structores, quibus ipse docendis instituendisque præerat.* Sed forte vnus M. Crassus stolide ostentandis diuitiis modum nesciuit ponere. Absit hoc credere de Romanorum omnium catissimo & attentissimo rei parandæ & conseruandæ magistro, quem M. TVL. CICERO *offic. III. 19.* turpis lucri causa in foro saltaturum fuisse asserit: tantum abest ut prodigalitati vel suspicio in bonum virum cadat. Porro itaque doceat PLVTARCHVS, cui vsui Crassus tot mancipia habuerit. *Maiorem, inquit, diuitiarum partem ex igne & bello confecit.* Forte igitur alchemiam exercuit, cinisibonibusque multis indiguit, aut mineram arenariam Becheri, multo ministerio indigentem, coluit? Audies rem: *quo enim tempore Sylla urbem bello cepit, tum vendendi Crassus accipiendique nullam finem fecit. Præterea incendia iam domesticum malum per urbem grassari cernens, & ædificia multa nimio pondere & contignationum multitudine corruere, atque in se residere, coemtis ultra quingentos servis,*  
*qui*

*qui architecturæ & ædificandarum domuum essent periti, deinde ædificia vel incensa, vel his vicina, a possessoribus, quos metus & incerti rerum euentus mouebant, vili pretio redemit, eaque ratione magnam vrbi Romæ partem suam fecit.*

## §. XI.

Ergo vere Pericles fuit M. Crassus, qui Romam ex cineribus suis resuscitauit, & diuitias suas distribuit. Immo vero nihil minus dixeris. Pericles toti Athenarum vrbi proderat, publicam pecuniam ædificiis splendidis & sumtuosis impendens, quæ per ciues curabat excitari & perfici: M. Crassus mancipia suo ære emta operibus his adhibebat perficiendis, iniquo tempore & dubio, vt felicioribus temporibus eadem ædificia, quanto maximo posset pretio, venderet, suamque crumenam plurimo lucro impleret. Ceterum ab ædificandi studio tantum abhorrebat, vt in suam gratiam atque vsum, quum tot fabros possideret, non nisi vnicam domum exstrueret, prudenter ratus, ædificandi studio laborantium vires, nullo aduersario, a seipsis comminui. Vidi-  
mus in vno Romano, quales, paucissimis forte exceptis, in seruos fuerint, quantopere illis inhiauerint, quantoque suo emolumento, rei autem publicæ detrimento, illorum opera vfi fuerint. Sed nondum discedere hinc libet, donec alia simus intuiti, inuenerimusque rationem veram, cur apud Romanos senatorius & equester ordo opificum collegiis semper aduersatus sit, resque suas omnes per seruos administrare maluerit, quam liberorum vti ministerio. Scilicet penes se solos esse neruum rerum regendarum, diuitias, cupiebant, omninoque cauendum sibi existimabant, ne quid in alios ciuium or-

dines fluere, nisi se distribuentibus, ut fauorem ac gratiam plebis, si in magistratuum petitionibus eo opus esset, sibi redimerent. Quo itaque magis indigentes plebei essent, eo facilius redimi ipsorum fauor, quo minus egerent, eo maiori largitione demerendam plebem, facile intelligebant. Atque hæc potissima fuit ratio, cur patricius Romanorum ordo numquam collegiis fauit, & quum impediri amplius non possent, ad nullam rem adhibuerint liberum ciuem, quam quidem per seruos possent efficere. Non enim minor solum est impensa in seruum, quam si liber homo remunerandus est: verum etiam exactio facilior est, & in illos, qui aliquid interuertunt aut male administrant, promptior animaduersio.

## §. XII.

Id uero quanti fuerit emolumentum Romanis equitibus, vel unico æstimemus exemplo publicanorum, quo ordine, CICERONE *pro Plancio c. 9.* teste, flos equitum Romanorum, ornamentum ciuitatis, firmamentum reipublicæ continebatur. Horum societates erant, quæ redditus publicos populi Romani in certa quadam provincia, a censoribus, quibus hæc cura a magistratu permissa erat, in publico foro, ad hastam conducebant in proximos quinque annos. Intererat horum nullum vectigal, quod pensitandum erat, omittere: quumque id ex tribus potissimum proueniret, agris scilicet decumas tribuentibus, pascuis, unde scriptura proueniebat, & rerum venalium importatione ac exportatione, quorum nomine portorium soluebatur: facile colligitur quantas familias publicani habere debuerint in amplissimis

ac locupletibus prouinciis, per saltus, agros, portas atque custodias dispersas, quæ inuigilarent, ne quid elabi posset. Non dissimulat hoc CICERO *pro lege Manil. c. VI. §. 16.* & res ipsa per se patet. Iam si tot locis res per liberos homines procuranda fuisset, quantum non decessisset mancipibus, quod mercedis loco his erat tribuendum: ne dicam quanto minori negotio emungatur seruus, si forte quicquam interuertat, quam liber homo & Romanus ciuis. Nihil itaque mirum, quod Romani seruos quam plurimos habere, in magnam felicitatis partem reposerint.

### §. XIII.

Enimuero hæ rationes seruos quam plurimos habendi, etsi nec reipublicæ vere utiles fuerunt nec honestati forte per omnia satis responderunt, excusari tamen posse videntur. Sed acceperunt aliæ prorsus inhumane & iniustæ, velut sunt illæ, quæ vtriusque sexus homines ære emptos impuris libidinibus tradebant, aut homines nullo flagitio pollutos gladiatorio ludo includebant, ut miseram artem ibi edocti, cæde mutua cruentum spectaculum sanguinariis Romanis præberent. Quæ res fere interitum Romano imperio attulisset bello Spartacio: quemadmodum paulo ante bellum seruile, in Sicilia exortum, Romanos erroris sui in seruitiis cumulandis arguerat, multorumque millium ciuium strage conuicerat. Sed hæc ex historiis abunde obuia mittimus, nec ipsa hæc hæc hactenus allaturi, nisi opus visum fuisset nostratum aliquos, qui antiquos auctores parum versant, aliis nimium occupati laboribus, de antiquis rebus

admonere. Atque hæc dicta de servis apud Romanos, libera Rep. sufficiant.

§. XIII.

Quum tandem illud tempus accederet, quo vitia male constitutæ reipublicæ morbos illos excluderent, quæ libertati civium attulerunt interitum, & equestrem ac senatorium maxime ordinem deprefferunt, servorum ordo in primis amplificatus est, ipsis iam senatoribus & equitibus Romanis, quo Cæsaribus placerent, easque dominandi in alios condiciones consequerentur, quibus servi ipsorum vel liberti gaudebant, apertissime servilem sortem subeuntibus. Eius vero quasi præludia videmus in C. Iul. Cæsare, qui, nondum confecta, quam meditabatur, monarchia, tantum iam deprefferat Romanorum nobilissimos, ut tirones gladiatorios, quos muneri in filiae memoriam populo edendo destinaverat, neque in ludo, neque per lanistas, sed in domibus per equites Romanos, ac etiam per senatores armorum peritos, erudiret, precibus enitens, quod, teste SVETONIO *cap. XXVI.* epistolis eius ostenditur, ut disciplinam singulorum susciperent, ipsique dictata exercentibus darent. En populi Romani senatores & equites lanistas, quod nomen Tuscorum lingua carnificem denotat. Horum conditio semper servilis aut libertina fuit. Sed longe apertior est in confessam servitutem transitus illorum, qui, munere ab eodem Cæsare in foro edito, depugnauerunt, Furii Leptini, stirpe prætoria, & Q. Calpeni senatoris quondam actorisque causarum, de quibus apud eundem SVETON. *cap. XXXIX.* Quin Pyrrichiam tunc saltauerunt Asiæ Bithyniæque principum liberi:

liberi: & Iudis Decimus Laberius, eques Romanus, minimum suum egit. Octavius Augustus ad scenicas quoque & gladiatorias operas etiam equitibus Romanis aliquando usus est. Confessæ servitutis hoc signum est: auctorati enim iurabant vri, vinciri (an *virgari*?) ferroque necari: de quo plura cupientem amandare liceat ad IVST. LIPSIVM *Saturnal. lib. II. cap. V.*

## §. XV.

Quantum vero cunque Romani supercilium ponerent, Cæsaribusque semet subiicerent, raro tamen vlla in re Cæsares patriciorum opera usos esse videas, quam per servos suos efficere poterant: præsertim si tale esset negotium, a quo rei parandæ & locupletandæ ansa præberetur: prorsus vt nunc paterentur id a Cæsaribus, quod ipsi tentioribus civibus intulerant. Sed melius hoc exemplis discemus. Intueamur Claudii Cæsaris servum Drusillanum, cognomine Rotundum, dispensatorem Hispaniæ citerioris, hoc est, nisi me omnia fallunt, procuratorem Cæsaris. Commemorat ipsum PLINIVS *hist. natur. L. XXXIII. c. XI.* non sine conspicua indignatione, quæ ipsum videtur prohibuisse, ne consuetam appellationem ipsi tribueret. Facile autem apparet, non tam iratum fuisse ob lancem argenteam quingenariam, aliasque octo eius comites quinquaginta librarum, quam quod tam opima, tam late patens provincia seruo procuranda a Cæsare commissa erat. Non minus enim quam duas tertias totius Hispaniæ hæc vna citerior complectebatur inde ab Augusti ævo. Nam quicquid supra Durium in septemtrionem vergit, omne eo referebatur; deinde quicquid a Carthagine nova per Tole-

Toletum ducta ad Durium linea, vsque ad Pyrenæos montes hinc superest, omne citerioris Hispaniæ nomine censebatur. Alium commemorat idem PLINIVS *lib. VII. 39.* qui sub Neronis principatu belli Armeniaci, propter Tyridatem gesti, dispensator fuerat, quem Nero H-S. CXXM. manumisit. Ne dicam de senatoriis ornamentis, & prætoriis, quæ principum gratia libertis suis impetrauit: de quibus videatur idem PLINIVS XXXV. 18. & SVETONIVS in *Claudio cap. XXVIII.* Quæ quidem auctoramenta satis efficacia fuisse videntur, ut seruire Cæsaribus non adeo multi valde refugerent: quamvis nondum inuenire medicos licuit, de quibus asserere possim, quod, senatores & equites Romanos imitati, seruitutem sponte sua subierint.

#### §. XVI.

Atque hæc dixisse de seruis veterum, & seorsim Romanorum, in vniuersum sufficiat. Tempus enim iubet ad seruum medicum propius accedere, quo ipsius etiam vera imago omnibus exhibeatur. Vt autem felicius versari in illo eruendo possimus, supponere nobis ex historia medicinæ liceat, quod alibi probatum est, antiquissimam medicinæ partem esse chirurgicam: cuius quidem fidem facit CORN. CELSVS, ad HOMERVM non in-scite prouocans, *Lib. I. præf.* Quum vero ad morbos alios etiam curandos ars descenderet, antiquissimam fuisse diæteticam curationem, cui demum accessit, sat lentis passibus, pars illa, quæ medicamentis ore exhibendis, aut exterius admouendis, omnium morborum medelam pollicetur. Iam vero quis non videt, quam multa sint in chirurgica & diætetica medicina, im-



mo etiam in pharmaceutica, quæ vnus vir non possit omnino solus præstare, aut quæ multis occupatus recte præstare non queat? Cogitemus membrorum luxatorum aut fractorum repositionem, quæ sæpe plures delassat, neque tamen a quouis rerum harum imperito potest adiuuari. Hinc est, quod HIPPOCRATES *de decent. orn.* §. IX. & XI. requirit τὴν ὑπουργίην, *ministerium*. Tale ministerium medico Asclepiadæ, qualis erat Hippocrates, præstabant discipuli, vnde §. XII. de delectu inter hos habendo ita præcipit: *sit autem ex discipulis aliquis præsens curando: deligito autem ex ipsis eos, qui iam in arte progressum fecerunt, quo ea, quæ in arte utilia sunt, addant, aut secure offerant. At vero imperitis nunquam quicquam procurandum committes.* Hi discipuli antiquissimis Græciæ temporibus non alii erant, quam Asclepiadarum filii, qui a teneris, quod aiunt, vnguiculis, ad artem deducebantur, sui que tirocinii annis ministrando senioribus artem accipiebant, salutari instituto. Ita enim eueniebat, vt tales euaderent, quales requirit HIPPOCRATES *de articulis* §. IX. *multarum*, inquit, *rerum peritum medicum esse expedit, usque adeo etiam frictio.*

## §. XVII.

Enimuero Hippocratis ætas in id tempus incidebat, quo Asclepiadarum medicinæ fatalis ingruerat terminus. Illo quippe tempore iam multi vel plane non Asclepiadæ artem exercebant, a ciuitatibus & rebus publicis stipendio annuo conducti: vel ipsimet Asclepiadæ relictis suis, vt ita dicam, canonicatibus, περιεργάζοντο: quibus ipsemet noster Hippocrates semet adiungebat, qui Co relictâ, aut, vt hostes eius, hæreti-

cum hunc denigraturi, calumniati sunt, ob nescio quod crimen fugiens, Thessaliam & Thraciam peragrauit. Talibus vero extra institutum Asclepiadarum viuentibus, si ipsi libros non haberent aut discipulos non illico inuenirent, nihil erat commodius, quam seruos suis vsibus aptare, quibus permetterent & demandarent ea, quæ per se vel nolebant, vel non poterant, agere. His vero quando domialis aliquid acciderat, variam potuisse fortunam euenire, facile coligitur: vnde vnam setuorum medicorum originem licet cognoscere. At vero circa eadem tempora accidit medicinæ aliquid, quod faciem eius vniuersam mirum in modum mutauit, seruorum autem medicorum pullitiam non minus fecundam intulit, quam si locustæ fato quodam in agros aliquius fertilis regionis semel fuere delatae.

#### §. XVIII.

Scilicet per sæcula iam complura inter homines Græca lingua vsos fuerat institutum athleticum; quod & gymnasticum dicitur. Illud initio quidem suo gloriæ tantum causa a nobilissimis totius Græciæ viris exercebatur. Mox etiam ad sanitatis & boni habitus acquirendi & conseruandi scopum transecebatur, certisque legibus circumscribebatur. Dirigendæ rei adhibebatur medicus, quem *ὀψευστήν* vocabant: illeque omnia, quæ ad rerum illarum, quæ vulgo vocantur, non naturalium vsus pertinent, præscribebat. Inde nascebatur diæta athletarum, in qua erebra erat enematum necessitas, inunctionum, frictionum, balneorum quotidianus vsus. In tanta autem multitudine τῶν γυμναστικῶν, exercitatorum, opus sane erat multis hominibus; qui ad nutum & iussum

sum τοῦ ὑγιενῶν, cuius talia administraret: vnde confequitur, cuius gymnasio multos adhibendos fuisse, qui talia peragerent: quumque viliora essent, quam vt liberi, illo quidem Græciæ statu, istis sese offerrent: iam noua seruorum vel opportunità vel necessitas enascebatur. Erat vero & aliud in instituto athletico, quod sæpe necessariam faciebat chirurgicam curam. Nam vbi homines saliendo, luctando & pugillatu exercentur, crebræ enascuntur occasiones luxationem & fracturarum, contusionum etiam a pugnis inflictis, hinc sugillationum, tumorum, inflammationum, suppurationum, apostematum, vlcera. His omnibus quum ὁ ὑγιενῶς suos etiam adhiberet seruos, non iam solum sibi videbantur & aliis artem boni habitus comparandi & conferendi perfecte callere, vbi per multos annos in gymnasio seruiuerant, verum etiam chirurgiæ plurimorum casuum perquam gnari. Veroque simile est tales vel a minus felicibus vrbibus pretio emtos, vel a magistris libertate donatos, initium fecisse illius sane antiqui dedecoris, quo ipsius iam Hippocratis æuo plures luxata reponendi enchireses a gymnasiis repetuntur: quæ res tandem in Græcia ita incoleuit, vt temporibus ORIBASII nullam talium chirurgiam fuisse, nisi penes exercitatorum præfectos, clare appareat.

§. XVIII.

Circa idem tempus, quo HIPPOCRATES COVS floruit, vixit etiam PRODICVS, seu HERODICVS ille, qui rem gymnasticam ad medendum corporibus morbo aliquo tentatis transtulit. De hoc quidem viro alibi plenius paulo diximus: nunc sufficiat indicasse,

quod, PLATONE *politicor.* III. p. 399. & PLUTARCHO *de ser. num. vindict.* p. 359. edit. Bas. testibus, primus gymnasticam medicinæ miscuerit, hoc est, artem boni habitus conciliatricem & conseruatricem eo adduxerit & accommodauerit, ut corporibus certo iam morbo confectantibus, ad ipsorum incrementa præoccupanda, prodesset, aut prorsus sanitatem integram iisdem redderet. Quin ipse in sese felix specimen noui inuenti dedit: quippe eis *φθίσιν, ἀνήμερον πᾶσι*, *ἐμπροσών*, quum phthisi, morbo alias incurabili, correptus esset, exercitationum beneficio ad conspicuam ætatem productus fuit. Hæc res quum ipsi bene successisset, non deerant qui vitæ longioris cupiditate eiusdem artis præsidio vterentur: eo-que tandem valuit, ut eueniret, quod PLINIVS *Lib. XXIX. cap. 1.* refert, scilicet ut *instituens quam vocant iatralapticem, reuenditoribus quoque medicorum ac mediastinis vendigal inueniret.* Paucis iuuandus hic est lector, ut Plinium facilius intelligat. Antea dixerat de templis Aesculapii, in quibus antiquissima Græcorum medicina exercebatur. Ab horum septis discedens, post complures alios, etiam Hippocrates, instituit illam, quæ *clinice* vocata est, quoniam a medicis *περιόδευταις*, extra templa obambulantibus, ad τὴν κλίνην, lectum, quo ægrotantes domi suæ decumbebant, exercebatur. Hique clinici & periodeutæ sua adsciscebant ministeria, *ὑπεργύν*, siue discipuli essent ex ingenuis, siue serui. Herodico autem nunc famam nouæ suæ medicinæ exercitatoris crebris successibus parante, effectum est, ut non solum clinici, qui ante non longum tempus exorti erant, quædam arte sua facerent; verum etiam illi, qui clinicorum

antea

antea vel ministri vel serui fuerant, frictiones, inunctionesque administrare, & quæ ad balnea spectant parare docti, vestigal copiosum haberent, quum plurimi essent, qui valetudinem confirmare vel emendare, ad Herodici nouam methodum, scilicet gymnasticam, cuperent.

## §. XX.

Vidimus iam seruorum medicorum originem & multiplicandi eosdem occasionem apud Græcos variam, quæ omnia in hac gente ita comparata iam erant PLATONIS temporibus, quippe qui *de legib. IV. p. 563. b. & 537. a.* huius rei luculentam mentionem facit, medicorumque *ὑπητάς, ministros*, alios esse liberos, alios seruos, testatur; vtrisque autem medicorum nomen tribui; sed multum interesse, inter medicum ac ministros, porroque inter ministrum liberum & seruum, addocet: quem locum exhibuimus in *hisor. medicor. p. 327. §. 47.* Eodem quoque modo comparatam fuisse rem cum exercitatoribus, ex eodem Platone ibidem adductum est. Atque tunc temporis Roma tam erat exigua, vt vix innotuisset iam Græcis: & ab illo æuo, quo Plato floruit, quodque cum anno vrbs Romæ CCCC. congruit; vsque ad illud tempus, quo se Græcorum rebus immisceuerunt Romani, centum & quinquaginta anni effluerunt: Et quamquam antea, quum magnæ Græciæ populos bello subiugarent, aliquid ex rebus Græcorum accepisse videntur; morum tamen & studiorum æmulatio nulla valde notabilis elucebat, donec, bello Macedonico contra Philippum, & Syriaco contra Antiochum, feliciter confectis, manifestius cum Græcis ciuitatibus,

D. 3

qui-

quibus libertatem restituerant, commercium intercedebat, huiusque gentis studia & mores quamplurimos Romæ amatores atque admiratores inueniebant. Tunc accidit, quod HORATIVS canit, *epist. II. I. vers. 156.*

*Græcia capta ferum victorem cepit, & artes  
Intulit agresti Latio.*

Sed & illud vere de Romanis dici tunc poterat, quod idem de Græcis posuit, *vers. 93.*

*Vt primum positis nugari Græcia bellis  
Cœpit, & in vitium fortuna labier æqua,  
Nunc athletarum studiis, nunc arsit equorum:  
Marmoris aut eboris fabros aut æris amovit. Cetera.*

Quæ omnia quum facerent, & rusticitatem pristinam munditiis Græcis expellere studerent, suo tamen adhuc ævo conquerendi causas habebat idem pœta *l. 6. vers. 159.*

*- - - Sed in longum tamen ævum  
Manserunt, hodieque manent vestigia ruris.*

### §. XXI.

Nimirum erant quidem inter Romanos viri in summa dignitate collocati, animique erectioris, qui liberaliter optimum quemque ex Græcis, qui aliqua virtute præstaret, habebant: quos inter L. Corn. Scipionem Africanum, L. Aemilium, C. Lælium, & paucos alios in sago & toga celeberrimos viros, laudare deberem, si id meum iam institutum pateretur. Longe tamen plures erant, quibus satius videbatur liberalium artium fructus absque liberalitate percipere: quare loco liberorum hominum, quos modo laudati Romæ principes amicorum loco habebant & fouebant, ipsi sibi quærebant seruos grammaticos, id est qui auctores Græcos,

tam

tam ligatæ quam solutæ orationis interpretarentur & explicarent, sibi que & liberis a studiis essent, bibliothecarios, anagnostas, notarios, librarios, musicos, pictores, architectas, longeque plures, quorum conditio hodie inter satis liberales achonestiores refertur. Satis magnum est, quod in eiusmodi homines, si præstantes in arte sua essent, impendebatur pretium. Sic PLINIO *hist. natur. VII. 39.* auctore pro vno grammatico data fuerunt DCC festertia, quæ summa viginti thalerorum millia excedit: alium ducentis millibus nummum Quinto Catulo entum, i. e. quinque vel sex millibus thalerorum, SVE-TONIVS *de illustribus grammat. cap. III.* commemorat.

## §. XXII.

Præ ceteris autem Romani expetebant seruos medicos, postquam inter ipsos luxuria populariter grassari cœpit, ac diæta athletica penitus obtinebat, priscis Romanis utique ignota, totaque a Græcis ad eos traslata. Diætam quum dico athleticam, non illam intelligo, quæ utebantur οἱ νομιμῶς ἀθλοῦντες, qui ad leges athleticas tenebantur tempore τοῦ προαγῶος: sed laxam talem, quæ cibis in cœna maxime repleri, in multam diem protrahere somno uti, mane ventriculum vomitu, intestina enematibus infusis deplere, a meridie vngi, exerceri, sudare, fricari, lauari, iterum vngi requirebat: quæ singula Romanis quotidiana fuisse neminem latebit, qui ipsorum monumenta vmquam attente legit. Atque talibus non solum sani utebantur, verum etiam aliqua labe valetudinis afflicti primum ab his diuerso modo sibi attemperatis & ex præscripto medici imperatis, opem petere solebant: ut CORNELIVM CELSVM legenti palam

palam constabit: neque minus ex GALENI *de sanitate tuenda libris*, quos Romæ degens scripsit, intelligitur. Huius diætæ intuitu vix non in omnibus, modo non valde egenorum, domibus, erant, quæ ad balnea & inunctiones, vt & exercitationes, commoda & apta essent domicilia: quin nec in villistalia desiderabantur, vt inter rei rusticæ scriptores COLVMELLA *lib. I. cap. 6.* docet. Omnium autem clarissime hoc apparebit PLINIVM legenti, qui *lib. II. epist. 17.* & *lib. VII. ep. 6.* villas suas describens gymnasii, quod in illis fuit, omnes partes, balnei cellam frigidariam, baptisteria, vinctuarium hypocauston, propnigeum, piscinas natatorias, apodyterium, sphæristerium, aliaque huc pertinentia, accurate enarrat.

### §. XXIII.

Atque hic erat Rhodus illa, qua plerumque saltandum erat seruo medico, qui dominum, quem prius exercitationibus delassauerat, hic excipiebat, fricabat, lauabat, vngebat, vnde αἰσθηταί, *reunētores*, & composito vocabulo ἰατροαἰσθηταί, *reunētores medici*, appellabantur. Hi erant, qui τῶν ὑγιειῶν, gymnasii præfectorum, medicorum clinicorum, periodeutarum, aut nouæ ab Herodico inuentæ medicinæ gymnasticæ professorum, mediastini fuerant, ipsisque iubentibus & præmonstrantibus habitum aliquem in vilissima artis particula adepti, aut a talibus instituti, pretio deinde magno venditi erant. Hi vero, pro eo ac multa erant in hoc negotio seorsim obeunda, in magnis vtique familiis, varii erant, vt balneatores, fornacatores, qui ignem in fornacibus curabant, capsarii, qui vestium curam in apodyterio gere-



gerebant, fricatores, qui frictiones ex arte peragebant, dropacistæ & alipilarii, qui pilis euellendis operam dabant, tonsores, qui capillos & barbam radebant, tractatores, qui articulationes membrorum molliter trahebant & ducebant. Erantque huius generis seruitia pro sequiori sexu etiam feminina, vt tonsrices, tractatrices, picatrices, paratiltiæ: insuper etiam ornatrices & comatrices recensentur. Et non solum in priuatorum domibus hos reperimus, verum etiam in publicis balneis & thermis: quem morem hodieque inter Turcos obtinere ex itinerum descriptionibus facile intelligere licet. Conf. D. D. DAN. CLERICI *histor. medico. part. III. lib. 1. cap. 2.*

### §. XXIII.

His accesserunt deinde, ex Aegyptiorum quantum colligere licet, instituto, qui particularium quorundam morborum ac membrorum laborantium curam pollebantur, vt ocularii, dentium medici, auricularii: quorum aliquos insignes diuitias adeptos legimus, vt libertatem stupendo pretio potuerint redimere. Et oculariorum quidem medicorum crebram mentionem, vix tamen aliorum, quam seruorum, in monumentis Romanorum inuenimus: quorum necessitas maior erat, quo frequentius in suis regionibus lippitudine seu pituita oculorum laborabant, quod inde facile colligitur, quia vix de alio morbo cum maiori cura præcepit CORNELIUS CELSVS *lib. VI. cap. 6. & VII. cap. 7.* cui si addamus AETIUM VIII. 93. PAVLVM AEGINETAM *lib. VI. §. seqq.* vix satis mirari possumus mali grauitatem, quod

E

meden-

medentes ad diras illas curationes, hypospathismum, periscyphismum & angiologiam deduxit: ægrotis autem persuasit vt se carnificinis istis subiicere non vererentur, vnde, si res ex voto omnino successisset, non poterant non fœdæ crebræque cicatrices remanere.

### §. XXV.

Qualibus præceptoribus serui hi medici vsi fuerint, magna ex parte iam diximus. Enimuero quum Cæsari, adhuc priuato; facile fuerit seruis ad gladiaturam ære comparatis præceptores inuenire equites Romanos, immo senatores armorum peritos: quid mirum si potentiores Romani ex medicis Græcis inuenerunt, qui vel gratiam demerituri, vel pretio adducti, seruos ipsorum docerent artem; ex illis scilicet, de quibus poeta dixit:

*Græculus esuriens in cælum, iusseris, ibit.*

Deplorauit hanc calamitatem optimus GALENVS *meth. med. libr. I. cap. I.* cuius orationis grauissimæ partem huc adferre non piget: *Non qui melius artem callet, sed qui adulari aptius nouit, apud istos (magnates Romæ) magis in pretio est. Huic omnia plana peruiæque sunt, huic ædium fores patent, hic breui efficitur diues, plurimumque potest: huic discipuli multi a cubiculis, ubi iam fuerint exoleti, traduntur. Quod Thessalus ille intelligens, non solum cetera Romæ diuitibus assentabatur, sed etiam artem sex mensibus traditurum se professus, quum plurimos discipulos facile comparauit. En præceptorem seruorum medicorum, qui non particulam artis docere pollicebatur, sed integram artem, non amplius longam, qualem veteres tradiderant, sed curtam magis & mutilam, quam breuiem*

uem, eam tamen, in qua audacia, garrulitas, & seruilibus ingeniis cognata assentatio, beneuolentiam & opinionem comparare & conseruare apta, mutili manique monstri turpitudinem inuolutura & obtektura esset.

§. XXVI.

Sticimus haftenus seruum medicum apud Græcos ortum, Romamque translatum: omninoque nihil celauimus aut dissimulauimus, quod inuenire quidem licuit, ex quo possit horum hominum conditio clare perspicui. Nihil nunc superest, nisi illud, vt quæramus, fieri ne possit vt ullus homo, qui ratione recte utitur, aliquid toti medicorum ordini contumeliosum hinc eruat, quod Græci primum aliqua, quæ in arte viliora sunt, per ministros suos peregerunt, quumque liberi homines non semper suppeterent, seruis etiam ad talia institutis vsu fuerint; qui qualicunque demum modo ad Romanos delati, in hac gente, seruitiorum multitudine semper gauisa, luxuriæque magis etiam quam Græci dedita, vtpote diuitiis maioribus abundante, mirum in modum aucti multiplicatique sunt. Si nihil homini vel ordini imputari debet, quod sua culpa non accidit, aut quod impedire in potestate ipsius non fuit situm: certe priscis medicis, qui in Græcia & Romæ vixerunt ab omni seruitute liberi, exprobrari non potest, quod alii a medicina nomen gerentes seruili conditione fuerunt. Quis sanæ mentis omnibus Romanorum senatoribus & equitibus obiiciet, quod aliqui seruiles operas præstiterunt, lanistarum munia suscipientes, alii apertam ac confessam seruitutem subierunt, gladiatoribus semet immiscentes? quis causarum patronos ob Q. Cal-

peni seruitutem laceffet? quis seruilem conditionem Pro-regum vel somniando declarabit, quoniam Hispaniam citiorem omnem vnicus seruus Cæsaris dispensauit?

### §. XXVII.

Quum de Græcia tam certum sit, quod medici conditionis ingenuæ fuerint, vt vix illorum, qui ob seruos medicos Romanos tantopere declamauerunt, quisquam de Græcis tale quid suspicatus videatur: ostendendum nunc superest, quod Roma quidem seruos medicos habuerit, sed non omnes propterea medici, qui Romæ quondam vixerunt, serui fuerint. Tantoque magis videtur necessarium in hanc rem cum aliqua cura inquirere, quum non solum vulgares quidam transcriptores & rhapsodi hoc asseruerint, verum etiam doctissimi viri ad hoc saxum impegerint, persuasum habentes ante Cæsarem tempora Romæ medicum non fuisse qui non seruus aut libertus, vel peregrinus fuerit. Quod autem ad quæstionem de peregrinis pertinet, videri illa quidem posset a nostro scopo aliena: sed quum peregrinus opponatur ciuium iura adepto, minime negligenda hæc res videtur, quum ostensurum me sperem ante Cæsarem tempora Romæ fuisse medicos ciuitatis iure gaudentes.

### §. XXVIII.

Non capit hic locus ea, quæ disputari solent de ciuitate Romanâ; quæ duobus maxime summis capitibus constat, iure scilicet Quiritium & iure ciuitatis *τοῦ ἐξουχίου* dicto: de quo plura cupientem remittimus ad III. HEINECCIUM *antiqu. Rom. append. lib. 1. §. XXII. seqq.*

Nobis

Nobis hoc nunc sufficit, quod peregrinus Romæ habitus non fuerit, qui iure Quiritium gauderet, sed ciuis; etsi non omnibus ille fruebatur priuilegiis, quæ ad ius publicum Romanorum pertinent. Iam manifestum est ante Cæsarium tempora Archagathum Lyfaniæ filium qui A. V. DXXXV. Romam a Peloponneso venit, ius Quiritium, dante populo, accepisse, quod CASSIVS HEMINA apud PLINIVM *Lib. XXIX. 1.* diserte scribit. En igitur medicum Romæ, ante Cæsarium tempora, non peregrinum, sed ciuem. Iam mihi audio obiectantes, vnâ hirundinem ver non facere. Concedo; proptereaue plures fuisse illico ostendam argumentis, vt spero, idoneis.

#### §. XXVIII.

Confido autem mihi datum ab omnibus iri, quod lex Aquilia sit ex antiquis, longe certe ante Cæsarium tempora lata & obseruata a Romanis: & quod ea non scripta sit nisi ciuibus. Iam vero illa lege cautum erat, *si medicus, qui seruum tuum secuit, dereliquerit curationem eius, & ob id mortuus fuerit seruus, culpæ reus erit. Instit. IV. tit. 3.* Ibidem quoque actio datur in medicum, qui per imperitum tam medicamentorum vsum, quam instrumentorum sinistram applicationem, seruum occiderit: vt & *π. lib. IX. tit. 2. n. IX.* ex VLPIANO obitetrrix, quæ medicamentum dederit, vnde mulier perierit, eadem lege teneri dicitur. Manifestum quidem est mulierem hic poni pro *aneilla*, quemadmodum alibi in eadem materia homo pro seruo positus inuenitur. Sed hoc quidem parum refert: illud maximi momenti est, quod hic sermo non esse possit de seruis medicis, aut

de obstetrice serua, sed de medico libero, & obstetrice libera. Nimis igitur præcipitanter scripsit Vir CL. *quod apud veteres Juris peritos in seruorum familiis medicos semper recenseri animaduernerit*, neque credo Iuris ciuilis Professore Regium, quem tamquam virum summa modestia parique eruditione laudat, in hoc auctorem ipsi fuisse.

### §. XXX.

Scilicet idem accidit medicinam vel integram, vel aliquam eius partem, siue nobiliorem siue ignobiliorem, Romæ exercentibus liberis hominibus, quod alias artes vitæ vtiles professis, & in collegia certa descriptis: quos quidem fatis magno numero adfuisse in illa vrbe indubium est, ea tamen conditione, vt nemo impedire posset, si quis domi suæ seruos habere vellet, per quos eadem efficeret, quæ illarum artium liberi professores & ciues efficiebant illis, quorum fortunæ non permittebant amplas seruorum familias alere. Quamquam vero nominibus suis multos tales enarrare non licet: quoniam Romanorum scriptorum, quæ ad nos peruenerunt, monumenta medicarum rerum non nisi obiter meminerunt, nulla tamen est ratio dubitandi, quin ante Cæsarum tempora liberi medici multi, sed serui medici plures Romæ fuerint, æque ac sub Cæsaribus, vbi medicorum conditio splendide honorata fuit, seruorum tamen medicorum insignis copia permansit.

### §. XXXI.

Quoniam quum supra §. XXVIII. seruorum medicarum mentionem faceremus, obstetrices omisimus: nunc  
vero

vero contendimus obstetrices Romæ liberas ac ciues fuisse vna cum obstetricibus seruis : pauca de illis hic addere, ante quam longius prouehamur, liceat. Obstetrices seruilis conditionis fuisse apud Romanos clare elucet ex *lib. 3. Cod. Commun. de legat. &c.* vbi de seruorum & ancillarum pretiis agitur, & obstetrices diserto nomine leguntur. Enimuero *PLINIVS lib. XXXIII. 6.* quando *obstetricum nobilitatem* laudat, vix cuiquam videbitur seruas illas obstetrices nobilitatis elogio notare : is scilicet, quo nemo forte acrius seruos infectatus est. Si quid coniecturis dare licet, crediderim fuisse iam tunc aliquas in obstetricio negotio præ ceteris, commendatas & famam ac gloriam adeptas, quæ non nisi nobilissimis feminis opera & consilio aderant, reliquis, quæ inferioris essent sortis, per seruas, aut discipulas liberas succurrerent.

### §. XXXII.

Atque illum hominum liberorum & seruorum in Romana rep. simultaneam commixtionem, vt plerasque res, quas alibi agitabant liberi, alibi serui agitent, non solum in vrbe licet ostendere, verum etiam rus ingressi eandem deprehendimus. Sic nihil magis solempne Romanis nobilibus erat, quam agros suos colendos seruis permittere : proinde tamen perpetuum & hoc non fuisse *M. VARRO de re rust. cap. XVII.* docet : *Omnes, inquit, agri coluntur hominibus seruis, aut liberis, aut vtirisque.* Longum esset addere hic quæ de liberis hominibus mercede conducendis, ut res maiores, vindemias & fœnicisia administrant, copiose ibi differit. Atque idem grauissimus auctor *cap. XVI.* ostendit quibus villis

villis vtilius sit ad certos & necessarios vsus potius habere anniuersarios vicinos, quibus imperent, medicos, fullones, fabros, quam in villa ipsa alere artifices seruos, a quibus fructum illum exspectent. Quo loco clare cognoscitur adeo non defuisse medicos liberos, ante Cæsarum tempora, vt & in oppidis & vicis Italiæ fuerint, quorum opera vti possent per agros sparsi rustici. Erunt fortasse, qui hoc loco existiment intelligendos esse seruos medicos, quia adiicitur, *quibus imperent*; quam vero aduersus scopum auctoris sit talis sensus, non facilius cognoscitur, quam si ipse locus integer legatur. Multum iam disputatum est de vi verbi *imperare*, quod a vetustis auctoribus sæpe in illum sensum ponitur, quando ægrotus medici opem sibi exposcit, iterumque de medicis, ægroto quid faciendum sit præcipientibus sæpissime adhibetur: de quo plura cupientes adeant D. D. VINCKII *amoenit. philolog. med. p. 435. seqq.*

### §. XXXIII.

Et sane miraculo proximum haberi deberet, si Roma medicis ciuibus, etiamsi strictissima acceptione non omnino ingenuis, plena non fuisset reddita ante Cæsarum tempora, quum & lucrandi in amplissima & locupletissima vrbe esset copiosissima occasio; quod medicos facile allicit; & luxuria longe lateque dominaretur, quæ sustentat & liberalissime nutrit plurimos; & ad illud vsque tempus ciuitas Romana infinitis Græcis data esset, vt ex CICERONE *pro Archia* intelligi potest, facileque probari copiose posset, si hic locus permetteret amplius excurrere, aut potius temporis iniqua breuitas



uitas de finienda hac excursione non admoneret. Enimvero parum referre existimo medicorum res & negotia, siue quis obstinate contendat paucos ante Cæsares fuisse medicos Romæ honoratos, siue plurimos fuisse concedat: quum ringentibus etiam inuidis constet, primum qui oligarchiam Romæ vitiosam in ordinem redegit, iniustam medicinæ oppressionem respexisse & medicos ciuitate donasse: eius autem gloriosissimum successorem Octauium AVGVSTVM adeo non pœnituisse honorati ordinis, vt porro maxima in ipsum decora conferret, quæ inde ab eo tempore non solum Romani imperii tutelaria numina nobis conseruarunt & auxerunt; verum etiam omnes cultioris orbis Reges ac Principes confirmarunt & summa clementia conseruant. Quo magis medici omni pietate, iadustria & obsequio venerantur dignitatis suæ fontem, summisque monarchis & rerum dominis vitam, immunitatem a doloribus & molestiis, incolumitatemque a summo rerum humanarum arbitro expetunt, quantumque in artis potestate situm est, eo studiosissime conferunt, vt iis amplissime inseruiant, a quibus ad amplissimam dignitatem fuerunt euecti.

## §. XXXIII.

Vnicum addendum videtur, quod serui medici Romæ non desierint post illum honorem ab Octauio Cæsare in medicos collatum, sed ad vltima vsque Romani imperii tempora manserint: certo sane & indubio argumento, quod Romanis medicus & seruus medicus non fuerint idem valentia nomina: & quod valde imperiti rerum prisicarum sint, qui hæc duo inter se disiunctis-

fima non tam coniungere voluerunt, quam vel incaute vel maligne confuderunt. Etiam hoc subiungo admodum aberrasse a vero, qui tam nude scripserunt seruos medicos Romanos illos fuisse qui chirurgiam exercuerunt, qui clinicam vero profitebantur, fuisse liberos & honoratos. Quamquam enim satis certum est aliqua, quæ chirurgi nostri hodie retinent, olim seruis solis propria & demandata fuisse: nunquam tamen negari potest, illud, quod chirurgiæ proprium est, & ex antiquissimo vsu id nomen gerit, tam apud Græcos, quam Romanos nobilissimos habuisse & maxime liberos cultores, nec tam sæpe aut tam longe a se disiunctos fuisse medicum clinicum & chirurgum, quemadmodum hodierni quidam scriptores existimant: qui mihi plane videntur nescire quid sibi velint, quando clinicum mox empirico mox chirurgo opponunt: quum nihil prohibeat eundem hominem esse clinicum, chirurgum & empiricum. Sed de hoc alio tempore, dante DEO, dispiciemus, nunc imponendus est

F I N I S.



NOBILISSIMO ET DOCTISSIMO  
DOMINO CANDIDATO

S. P. D.  
PRÆSES.

**N**on satis mirari possum humani generis mobilitatem, qua in varias partes illud vel fauor versat vel odium abripit, efficitque ut quos antea unice dilexerant mireque gratos habuerant, mox contemnant & deprimant, quin contumeliis proscindant. Non longe petendis exemplis opus est, quum nobis sufficiat medicina primi professoris, qui Romam peruenit, varia fortuna. Mire gratum fuisse, testatur PLINIVS, aduentum eius initio: mox sauitiam secandi vrendique accusabant, transitque nomen in carnicem, & in tœdium ars cum omnibus medicis. Esto aliquid peccasse Archagathum, & fortuna conuersa aliquam præbuisse causam: recte tamen totam rem aestimantibus si non artificis, tamen artis innocentia elucescit. Romani caruerant ad illud usque tempus medicis masculam chirurgiam exercentibus, & ex Pythagoreorum, forte etiam Etruscorum, disciplina habuerant incantationes quasdam, quibus dolores sedarent, luxa reponerent, alia emendarent. A curationibus generosioribus abstinerant medici, quos ex Græcia magna habere antea potuerant, e Pythagora

*schola deducti: sanguinem hi non miserant, scalpel-  
lum non admouerant sana cuti incidenda: quæ omnia  
quum faceret hic ex Peloponneso aduena, alius disci-  
pline alumnus & superstitiosus minus addictus, iam  
obnoxius calumnia fiebat, quum laudari etiam me-  
ruisset. Tulit itaque bonus vir non suæ culpa meri-  
tum, sed erroris alieni sibi acerbos fructus, totique  
ordini longo etiam interiecto postea tempore haud iu-  
cundos, primus in illa urbe collegit. Sed non illud  
solum exemplum ostendit quam exposita semper inui-  
diæ ars nostra fuerit. Fabula fertur ipsum Iouem  
Aesculapio, quod mortuos ad vitam reuocasset, indi-  
gnatum fulmine suo ipsum tandem percussisse: quid  
mirum igitur si Ioue longe inferiores medicis de hu-  
mano genere optime merentibus inuident, ipsosque,  
si non fulmine petunt, quod paucis licet, Theonino  
tamen dente arrodere conantur. Id vero tale est,  
ut sapiens a quo ferre animo debeat, seque solari  
vulgari versiculo, verbis quidem non adco conto,  
sed verissimo:*

*Nam sicuti nunc it, sic semper it iuit & ibit.  
Neque consultum existimo cuius calumniæ illico re-  
spondere, quoniam male defendendo multi causam o-  
ptimam perdidierunt. Sic isti futilissimæ accusatio-  
ni, tamquam medici per sexcentos annos Roma fuis-  
sent pulsi, in qua ne res quidem veri est, pessime re-  
spon-*

*sponderunt viri clarissimi ALMELOVEENIVS, BRVNNERVS, CLAVDERVS aliique medici, quippe, tamquam agnoscentes obiectum crimen, de eo tantum laborarunt, ne indecorum ordini esset, quod olim iniquius fuisset Romæ in aliquorum culpam animaduersum. Sed nec illud velim arrogantius & ambitiosius ostentari vera artis decora, quippe oculos inuidorum facile præstringentia, & pituitam, grauem morbum, inducentia, quæ deinceps efficit ut nihil acute videant, sed ubique vitium detegere sibi videantur. Illud nos diu monuit VIRGILIUS:*

*Pastores edera crescentem ornatæ poetam  
Arcades, inuidia rumpantur ut ilia Codro.*

*Aut, si ultra placitum laudarit, baccare frontem  
Cingite, ne vati noceat mala lingua futuro.*

*Recte TV quidem, nobilissime & doctissime Dom. Candidate, fecisti, quod seruum medicum non amplius palliandum inuoluendumque existimasti, sed protrahendum potius, & qualis reuera fuit, detracto omni fuco, sistendum existimasti, quo pateat nihil hic subesse mysterii, quod verorum medicorum gloriæ officiat. Quæ splendida olim ædificia excitabant, fere solebant illis addere πορρολόκεον quoddam, & qui bellos pusiones extra domum mittebant, collo olim appendebant, fascini auertendi causa, amuleta quædam figuras sæpe monstrosas aut non satis verecun-*

das habentes. Esto igitur servus tuus medicus illis  
 concessus, quibus oculus dolet ex conspectu fulgidi æ-  
 ris in honorem medicorum cusi & signati, cuius lar-  
 gam copiam proferendo & Britannis suis ostendendo  
 illustris vir RICHARDVS MEAD multos fecit  
 οἰμώτερον. Cum hoc nunc fabulentur, laudent, ride-  
 ant, aut si placet, eum corrumpant & servilis inge-  
 nii documentum quoduis capiant: TIBI cum omni  
 genuina Asclepii prole sufficit, πρὸς Θεῶν ἐντίμως κεκμηῖν  
 ἢ ἰητρικῇ οἱ δὲ ἰητροὶ θεοῖσι παρὰ τὴν χάριν κασι. Quod superest  
 gratulor TVIS in arte salutarī maxime conspicuis  
 profectibus, quibus patriæ tuæ, quam feliciter opto  
 contingas, plurimum TE profuturum esse ut spero, ita  
 auguror, immo potius confido, postquam virtutis &  
 eruditionis TVAE conspicua documenta tot ac tanta  
 apud nos dedisti, ut nemo sit, qui non abunde  
 TIBI favere debeat. Scripsi a. d. VIII. Maii  
 clb lcccxxxiii.

**S**o ist so bleibt es denn Dein fest gesetzter Wille  
Durch Deinen Abschied werther Lertzens-Freund,  
Das Band so uns're Brust bisher vereint,  
Das Band, so unauslöflich ist zu trennen?  
So soll ich nicht hinfort bewundern können,  
Wie herrlich sich der Frühling Deiner Jahre  
Mit reiffen Früchten achter Weißheit paare?  
Woblan! ich schweige nicht, bey diesen Vorsatz stille.

Ist Mund und Kiel zu schwach nach Würden zu bezeugen,  
Was für ein Trieb Dir meine Brust geweyht/  
Und läßt sich Deiner Gaben Seltenheit  
Nicht in den Raum gemeiner Lieder schreucken,  
So will ich doch auf treue Wünsche denken:  
Doch weil die Feder nicht zu schreiben waget,  
Was Aug und Hand Dir im Vertrauen sagt,  
So ist auch dis genug: den Willen nicht verschweigen.

Ich will denn ohne Dich mit Dir vereinigt leben,  
Und auch entfernt an Deinem Wohlergehn  
Und Wachsthum meine Lust und Freude sehn.  
Bermag ich sonst nicht Deinen Ruhm zu mehren,  
So soll doch dis ein jeder von mir hören:  
Daß Dich ein Geist, der lebens-werth, bewohnet,  
Wie aber Fleiß und Tugend sey belohnet  
Wird Dein gelehrtes Lob uns künft'ig Nachricht geben.

Hiermit wolte dem Herrn DOCTORANDO als seinem  
gewesenen werthesten Herrn Commensali sich zu  
fernern Andenken empfehlen

P.C.H.D.

Medicinz Cultor.

**E**rgo per antiquas cupis inclarescere laudes,  
 Et nova priscorum nomina fama dabit.  
 OPTIME SVECE TIBI? generoso differis ausu  
 De veteri Medicae nobilitate rei;  
 Effigies, statuas, atque ornamenta, salutis  
 Quae coluit patres Roma vetusta suae  
 Regia lectori monstras; opprobria tollis,  
 Falsisqueque, docens vera, silere jubes.  
 Euge bonum coeptum! summis quod laudibus arti  
 Tota Machaoniae sacra corona canet,  
 Ipse salutiferae doctrinae Praeses Apollo.  
 Jam sua, sponte TIBI templa praere jubet,  
 Deque novis famae justissima gaudia servans  
 Vindictis, laurum tradit & ipse togam.  
 Nec satis haec, Decori superaddit jura recenti,  
 Antiqui numen quae coluere suum,  
 Et pare quo tantum compenset munere coeptum,  
 Nomine TE dignum judicat esse suo.  
 Ergo novus patriae venies ac Magnus Apollo:  
 Sed mihi priscus, idem, Magnus Amicus eris.

ERNESTVS GOTTHOLD STRUVE,

Primislavienf. Vekaro-March.

Med. C.

